

KERATAN AKHBAR

TARIKH : 3 JULAI 2025
AKHBAR : HARIAN METRO
MUKA : 22
SURAT

RMK13 beri tumpuan tingkat taraf hidup rakyat

RMK13 beri tumpuan tingkat taraf hidup rakyat

Kuala Lumpur: Rancangan Malaysia Ke-13 (RMK13) yang bakal dibentangkan hujung bulan ini dijangka memberi tumpuan besar terhadap usaha meningkatkan taraf hidup rakyat, termasuk menaikkan gaji minimum kepada lebih RM2,000 menjelang 2030 dan memperkukuh pasaran pekerjaan melalui pelbagai projek pembangunan strategik, kata penganalisis.

Rancangan lima tahun yang meliputi garis masa 2026 hingga 2030 itu di-

jangka menempuh persekitaran mencabar berikutan ketidaktentuan geopolitik dan ekonomi serta potensi turun naik tidak menentu dasar perdagangan dan ekonomi AS.

Malah, ketegangan geopolitik di Eropah dan Asia Barat juga dijangka berterusan sehingga separuh dekad akan datang.

Dengan latar belakang perdagangan global yang rapuh itu dan sentimen risiko yang tinggi, harga komoditi juga dijangka kekal

secara amnya pada paras semasa sekurang-kurangnya sehingga 2029.

Menurut nota penyelidikan terbitan BIMB Securities Research, kerajaan dijangka mempergiat permintaan domestik sebagai teras kepada pertumbuhan ekonomi negara dalam tempoh 2026 hingga 2030, selaras dengan cabaran global yang semakin mencabar.

Katanya, ia mungkin termasuk pelarasan gaji untuk penjawat awam dan potensi kenaikan gaji minimum

kepada melebihi RM2,000 menjelang 2030.

"Pada masa sama, pelancaran latihan berterusan dan inisiatif peningkatan kemahiran boleh meningkatkan bahagian tenaga kerja mahir dalam tenaga kerja kepada lebih 35 peratus, yang boleh melonjakkan gaji median negara melebihi RM4,000 menjelang 2030," katanya.

BIMB Securities menjangkakan purata pertumbuhan Keluaran Dalam Negara Kasar (KDNK) 4.5 pe-

ratus setahun antara 2026 dan 2030 susulan keadaan luaran dan domestik.

Dari segi nominal, ia berkata, KDNK dijangka berkembang sebanyak 6.4 peratus setiap tahun dalam tempoh yang sama.

Katanya, ia menandakan penyederhanaan berbanding purata pertumbuhan KDNK nominal 8.2 peratus dicatatkan ketika 2021 hingga 2024 dan 7.9 peratus dalam tempoh pasca Krisis Kewangan Global dari 2009 hingga 2019.